

QUÆSTIO MEDICA,

Quodlibetariis disputationibus manè discutienda in Scholis Medicorum, die Jovis quartâ Januarii 1714.

M. ELIA COL DEVILARS, Doctore Medico,
Præside.

An morbi à Fluidis?

I.

SCRUTANTI Microcosmi fabricam, obvia primum tibi occurrit Liquidorum & Solidorum mira Compages; Machina namque Humana varius est innumerabilium tubulorum contextus, qui quidem omnes liquidis semper sunt pleni, tensi, moti & Elatere donati. Concinna tot partium positura, tot mirandæ earundem commissuræ, tot Liquidorum Solidorumve motus perennes & reciproci, non incertæ & mutabilis Fortunæ, sed solam Dei arguunt potentiam. Singularis Viscerum structura: variæ ex assiduo illorum labore manantes Functiones, sibi invicem circulariter principium & finis, causa & effectus: Alimentorum solutio, Fermentationis & Tritus opus: Chylolis primaria & simplex secretio: Hæmatosis, à duobus contrariis moribus oriunda, tritu & fermentatione: Secretiones omnes secundariæ, congeniti sibi analogi humoris ope celebratæ: Nutritio: Generatio: varii tandem ac innumeri nervorum & fibrarum motus, affectionum Animæ interpretes, Altitudinem Sapientiæ & Scientiæ supremi Conditoris dilucidè tibi commonstrant & prædicant. Miraris sanè tot & tam varios unius Machinæ effectus? nunc stupe intuens tot & tam calamitosos ejusdem à natura sua dechvis Errores. Dum hominum alii, vigente functionum integritate, perf. cta, sed rarissimâ fruuntur sanitate, alii, læsis iisdem functionibus, innumeris morbis, Epilepsiâ, Catarrho, Asthmate, Lue venereâ, Scorbuto, Rheumatismo, Arthritide immaniter cruciati, miserimam ducunt vitam. Alii vel æstuante torrido aëre, frigore rigent. Alteri vel in mediis aquis constituti, videntur sibi flammis circumdari, iisque torreri. Hi quasi mortui altissimo sepeliuntur sonno. Illi delirio & vigiliâ perpetuò excitantur. Hi mites, placidi & faciles. Illi furore accensi continuò debacchantur. Hi Ludiorum instar mirum in modum leviter moventur. Illi velut Simulacra pedes habent & non ambulant, manus habent & non palpant,

Ipsa quoque interitûs cum duro lingua palato

Congelat, & vena desistunt posse moveri,

Nec flecti cervix, nec brachia reddere motus.

Horumce stupendorum effectuum causam sciscitaris? attende ad universa Naturæ phænomena, quæ duobus tantùm Pugilibus, Fluido & Solido debentur. Alterutrius imperium capescentis vim & energiam sedulo perpende. Aliud enim propriis, alterum verò mutuantiis agit viribus.

II.

FLUIDUM corpus rectè definitur quod partes habet valdè tenues in perpetuo motu positas ac sponte sua disfluentes. Corpus solidum, quod sponte sua consistit, id est, quod partes habet juxta se invicem quiescentes, illud igitur agens, hoc verò patiens agnosce. Non unicum est fluidum corpus humanum afficiens, illiusque substantiam ingrediens. Primum ac præcipuum, Æther, Fluidum homogeneum, omnium tenuissimum, permixtissimo motu actum, cætera corpora permeans ac movens, cujusvisque figuræ capax, nullius tenax. 2^{um} Fluidum, Aër, ex particulis tenuibus, multi-

formibus, primo fluido innatantibus conflatus, maximo Elatere donatus. Aqua denique tertium Fluidum, ex partibus constans lævibus, teretibus, 1^o & 2^o fluido innatantibus. Hæc tria Fluida rectè dices Simplicia & Primaria, solidum solventia, soluti vehicula, quæ pro variâ sibi admixtâ principiorum sensibilibus, ex quibus solidum conflat, quantitate aut qualitate, varia constituunt Fluida composita, seu liquida, variis insignita nominibus; alia quippe sunt dulcia, lævibus, scilicet & obtusis particulis linguam leviter demulcentia. Alia salsa, aculeis & acris cuneis terrenâ compage intricatis munita. Alia Acria, particulis, multis angulis inæqualibus, Echinorum instar, protuberantibus donata. Alia Acida, aculeis longis, rigidis & scindentibus armata. Alia Austera, partibus, surrectis & paululum incurvatis pilis inhorrescentibus instructa. Alia Amara, obtusioribus cuspidibus velut scopis stipata. Alia Unctuosâ, partibus crassis, mollibusque globulis lentescencia. Alia demùm innumera propè Sapida, prout duæ aut plures Saporum variis gradibus commiscuntur species; hinc Chylus, variis Alimentorum principiis fetus; hinc Sanguis, Liquor heterogeneus, motor & motus, secernendorum Humorum parens, vitæ moderatur. Nec unicum est corpus solidum fabricam humanam constituens. Aliud enim est durum, sive osseum, ex tubulis densatis, & planâ superficie conjunctis effectum. Aliud molle seu carneum, ex tubulis constans laxè conjunctis, sanguine aliisque humoribus uberius irrigatis. Aliud Membranaceum ex iisdem telæ in modum connexis. Aliud Medullare, ex vesiculis mutuò commeantibus. Aliud Cartilagineum. Aliud tendinosum, &c. pro vario partium ex quibus coalescunt contextu. Hæc autem Solida communem admittunt parentem, Fibram videlicet fistulosam variis modis complexam.

III.

SICUT Fluidi agere & movere, sic & Solidi pati & quiescere proprium est; Solida siquidem, Fluidorum progenies, absque fluidis inertia jacent, suamque Existentiam & Essentiam ipsis acceptam referunt; veritati enim omninò consentaneum est Generationem, Actionem & Corruptionem Solidorum omnium à Fluidis pendere; ab his Animalia, Vegetabilia, ipsamet Metalla, Mineralia, ipsum Marmor gignitur, crescit & ipse Adamas. Compertum igitur teneas, liquido, seu succo Nutritio, vario pro diverso producendo Genere aut Specie, Solida omnia Natales suos debere. Ne Solida tamen, præsertim in animalibus, inertia & inutilia hæbeas cævero; quin immò cum Fluidis copulata & ab ipsis mota miros præstant effectus. Præcipua illis indita virtus, Elater, à quo fibrarum omnium Oscillatio, Arteriarum Diastole & Systole, vitæ complementum. Hunc Elaterem rectè deduces ex Aëre intra fibrarum poros incluso & compresso, per vim suam Elasticam se se restituere conante, & parietes porulorum distendente; (ipse enim Aër hanc mutatur virtutem ab Æthere partes suas faciliè mobiles & disjunctas, ipsique innatantes agitante, & suo motu circumquaque dissipante, itaut quam magnum possunt locum occupent.) Hoc autem Elatere urgentur Corporis Liquida, pinsuntur, attenuantur, & per immensam exilissimorum canaliculorum longitudinem transmittuntur; Sic Solida à Fluidis vim acceptam in Fluida vicissim exerunt, hæcque fugam semper molientia coercent. Sic Fluida activa semper, passiva quandoque fiunt. Sic Sanguis quæ ineptè sapius movet, patitur verbera, & ex se depromptis mulctatur viribus. Hi duo Athletæ, Fluidum & Solidum invicem indefinenter arietando totum adimplent vitæ numerum, cujus status duplex, Sanus & Morbosus. Quandju liquida hanc innumerabilem tubulorum compagem, pacato & facili negotio permeare valent, tandiu viget à morbis incolumis homo. Ubi primùm à requisita indole aberran-

etiam moras trahunt, aut effrenato cientur impetu, corruiat illiò hæc adeò mirabilis motuum æconomia, ingruitque Morborum cohors. Verùm in Machina humana naturali conformatione beata, liquida ritè disposita, solidas habent partes statutis à supremo Opifice legibus obundis semper paratas, nisi Fluida priùs vitiata de statu naturali illas deturbarint; Solidiorum namque peccamina mutuatitia sunt Fluidis debita. Omnem igitur qualemcunque Solidorum actionem Fluidis referre memento.

I V.

TRIA in Corpore humano distinguenda tibi veniunt. Solida, seu partes: Fluida, seu Spiritus & humores per eas fluentes: Actiones, seu Functiones ex illis profectæ quod in solidis est vitium functionem lædens, Morbum, quod in Fluidis Morbi causam; quod in Functionibus, Symptomina nuncupa. Morbus autem inordinatus est solidorum motus à quo læditur functio. Cùm enim partes solidæ functionum sint opifices, & Sanitas posita remaneat in harumce integritate, quæ quidem functionum integritas à regulari & secundùm institutas naturæ leges celebrato partium motu pendet, earum motus exlex functiones lædens constituat Morbum citra dubium est. Inordinatus ille motus, & Affectus contra naturam functionem lædens, Synonyma. Affectum verò cum Afectione confundas cave. Hæc alterius parens non illum semper producit. Sicut igitur Fluida neque crassi, neque copii, neque motu peccantia honorum omnium, sic à statu naturali devia, malorum omnium auctores habeto. Fluidorum crassis multiplex vitium, pro diversis quibus prædita sunt saporibus. *Acerbum* enim, *Acidum*, *Austerum*, *Dulce*, *Anarum*, &c. pro viribus aut copia magnam vim exerunt. Hæc si mutuà contemperatione quiescant, neque sensibus occurrunt, neque molestiâ quemquam afficiunt; at ubi horum quidpiam secretum fuerit, aut præ cæteris dominium teneat, tunc hominem cruciari solet. Si namque, ut prædicat Medicorum Princeps, *humor amarus parti cuidam effusus fuerit, quanta anxietates, assus & impotentia detinent; quos, acuti, acres aut arginiosi humores, agrotantibus dolores inferre valent; quanti iis furores, viscerum & Thoracis lacerationes & animi defectus suboriuntur.* At, inquires, hæc Fluidorum vitia Auctores habent solidorum errata. Esto interdum, sed secundariò. At unde prima solidorum errata: à se? nequaquam. Ergo à Fluidis priùs vitiatis. Corporis verò Fluida his primariò donari saporibus quis ibit inficias; Alimenta quippe variis referta lapidis principiis, salis, scilicet, acris, acidis, amaris, &c. saporibus suos chylo & sanguini impertiuntur; hic verò succis à se secretis. Huic sapidorum principiorum in sanguinem invectioni frustra obicem adhibes Mucum intestinorum. Testis est Sal sudoris, urinæ; testis, Sulphur Bilis, pinguedinis, testes, concretiones sulphureæ inflammabiles in hepate non raro repertæ, testis demum sanguinis è venis recens extracti Salsus sapor. Acr quoque miasmatis è terra, aquis stagnantibus vel aliis corporibus effluxis fetus, qualitates suas spiritibus, salivæ, humori tracheali aut ipsimet sanguini facilè confert. Topica tandem effluvia sua succis circumfluentibus per poros cutis immiscere valent. Hinc prima solidis inusta labebus rursus Fluidis inurenda. Sedulus autem advertas qualemcunque virtutem sub Fluidi vehiculo Solidis largiri; hæcque naturâ suâ quiescentia à Fluidis motum mutuentur necessum habere.

V.

AMBIGIS nunc utrum Morbi à Fluidis? singulos collustra & facile ac compertum habebis num causam efficientem semper Fluidum agnoscant. Omnes Affectus Comatosi, Apoplexia, Lethargus, Coma, Carus, Catalepsis, &c. sanguini crassiori & viscidiori, aut exuperanti, totam

Cerebri compagem prementi, vel lymphæ ejusdem indolis, Cerebri substantiam inundanti, vel demum spirituum crassitie, rarefactioni & nimio Elateri, Meniugum & vasorum omnium Oscillatorium motum interpellanti debentur. Convulsio, Epilepsia, Deliria omnia, ab humoribus salis, acribus, acidis aut alterius indolis fibras vellicantibus, spirituumque motum perturbantibus oriuntur. Ephialtes, Asthma, Peripneumonia, à sanguine uberiori, crassiori, viscidiori in pulmonibus hærente, ipso vasa distendente, & vesiculas angustante, ac propter moram aut ejus indolem quandoque nimium incalcescente originem ducunt. Catarrhus, Tussis, Coryza, Hæmoptysis, Phrysis, redundanti aut rarescenti sanguini, vel Serosæ Colluviei partes vellicant, vasa sanguinea, ipsammet partium substantiam erodenti referuntur. Cruditates omnes, innumerabilium ferè Morborum Genitricæ, Vomitus, Cholera-morbus, Cardialgia, Lienteria, Diarrhæa, Dysenteria, alimentis crudis, crassis, viscidis, frigidis, salis acidis, acribus, calidis, vel salivæ, succo stomachali, intestinali, Bill & succo pancreatico iisdem vitis labefactatis, fibras laxantibus aut irritantibus natales suos debent. Hydrops omnis, crasso aut soluto sanguini, vel succo acri lymphatica rodenti. Febres omnes, frequentissimi Affectus, aliorum Morborum individui ferè Affectæ, succo aut sanguini, crasi vel copiâ vitiatæ, Cordis & Arteriarum Elaterem irritantibus. Plethora ipsa, tot chronicorum affectuum parens, exuperantibus succis debetur. Quos tandem morbos non parium Animi Pathameta, aut Fluida in corpore præter naturam retenta. in curandis igitur morbis prima indicatio Fluidorum Medicatio; reparato quippe Fluidorum statu naturali, restituitur & Solidorum naturalis motus. Quid plura? externas quoque scrutare causas. Num sub liquidi vehiculo in massam sanguineam irrepunt venena, cò sæpius atrociore excitatura affectus quò diutius sopita remanent? Aër. ad inflegendos morbos maximè efficax, qui unus plurimos simul attingit, variis inquinamentis conspersus, terrarum, aquarum, cadaverum, aliorumve putrescentium gravi expiratione inquinatus, vel temporum tempestatumque mutatione calidior, frigidior, humidior, crassior, tenuior factus, acutorum ferè morborum est author, pestilentie semina plerumque invêhit, Catarrhos, Tusses, Gravædines, Rheumatismos inducit. Alimenta sub liquida specie innumera morborum semina in corporis humores invêhant. Sed quid singula commemorare? Uno verbo absolve. Morbi sunt motus Solidorum inordinati: à Fluidis autem omnes solidorum motus.

Ergo Morbi à Fluidis.

Domini Doctores disputaturi.

M. Henricus Besnier,

*M. Anton. de Justieu, à Regia Academia,
necnon Botanices in Horto
Regio Professor.*

M. Franciscus Maillardi

*M. Elias Col. de Vilars,
Actus Moderator.*

M. Joannes-Baptista le Brethon.

M. Petrus-Paulus Guier, Regii Mutilatorum Nosocomii Medicus ordinarius.

M. Joannes Bessé.

M. Joannes-Baptista Sylva.

M. Ludovicus Peirier, antiquus Facultatis Decanus, necnon Serenissimi Delphini Medicus Primarius.

Proponēbat Parisiis ANTONIUS LE MOINE, Parisinus, Baccal.
Medicus, A. R. S. H. 1714.

Ex Typographia J. QUELLEAU, Typ. Jur. Lib. Univ. in via vulgò dicta *Galande*.